



計部奏疏

卷之三
新餉司



計部奏疏目錄卷之三

新餉司

今日需財甚急疏

鮮運漸迫料理難緩疏

摘陳地方切要事宜疏

大工緊急借銀宜還疏

帑藏日匱一日疏

恭報拿獲大夥劫鞘強賊疏

榆關需餉至急疏

言音考
幣藏日匱一日疏

榆關夏餉缺額疏

狡奴窺伺告棘疏

大工緊急借銀宜還疏

大工緊急借銀宜還疏

大工緊急借銀宜還疏

畿輔東省召買綦難疏

恭報登兵出海之期疏

鼓鑄急需不容少緩疏

懇恩解餉詳部疏

關運糧料價增疏

入衛兵馬錢糧無措疏

裁兵似可得餉疏

危疆數月絕餉疏

差期告屆謹請裁併疏

五月無餉堪憂疏

錢局規畫已就銅本措辦宜先疏

兵餉當充還就疏

東西兩局未結疏

臣等謹將東西兩局未結各款開列於左

一、臣等謹將東西兩局未結各款開列於左

一、臣等謹將東西兩局未結各款開列於左

一、臣等謹將東西兩局未結各款開列於左

一、臣等謹將東西兩局未結各款開列於左

一、臣等謹將東西兩局未結各款開列於左

一、臣等謹將東西兩局未結各款開列於左

一、臣等謹將東西兩局未結各款開列於左

太子太保戶部尚書臣李

等謹

題為今日需財甚急今日理財甚艱敬矢愚衷仰

祈

聖裁事專理新餉山東清吏司案呈天啓五年二月

二十五日奉本部送戶科抄出戶科署科事左

給事中沈應時題前事等因天啓五年二月二

十一日奉

聖旨該部酌議具覆欽此又該刑科給事中霍維華

題為微臣奉

命入都謹將閭閻艱苦與沿途聞見據實入告以襄

國計以甦民困事等因奉

聖旨這本說的是畿南米價日增派糴價少遺累官民准將查減糧額議增糴價併准量那見徵之銀以待雜項之補漕糧既以大通橋盤兌之遲致稽剝船該部速查該管司官叅來究處其沿河委積滯爛可虞便着管漕院道催僭剝運屯田當在用兵之處確不可易屯撫應否裁革見屯之田作何

歸着該部議妥來說董應舉夙稱任事不必苛求畢自嚴即與推用本內錯寫字改正行該部知道欽此欽遵通抄到部送司案呈到部為照今日之財盡矣而當事者莫不拳拳以理財為臣部屬望而孰知夫餉少兵多入一出百興利者未聞長策言害者章滿公車雖欲為久長之計而無如目前之不給雖欲為生財之道而無如任事之無人何也即如截漕一事原為關鮮二運缺額姑為權宜之計行已數年于今今若一旦

忽議不截則三十萬之糧將從何出及查

畿南六郡召買米豆價值餉臣原題米價每石一兩五錢每石六錢五分臣部減為每石米價七錢五錢五錢五分及餉臣再疏臣部又米價每石增銀二錢豆價增銀五分今科臣之請既蒙俞允應聽餉臣于襍項內酌行量增襍項不及不妨那借見征屯田如科臣沈應時疏則謂大屯則大利小屯則小利乃科臣霍維華則以為或割民地以供官屯或獻汚下以避錢糧或多方剝

削以買補或累及原買為包完甚至奪守禦之官兵以撤防禦攘地方之見租以為己功似又息不償費利不補害兩臣之言利害何大徑庭也總之或屯有利或屯有害或宜屯于天津或宜屯于關外在彼中之知之也必自真確在兩臣之言之也不妨互異臣部難以遙度相應行談撫按道府虛公查議屯撫所屯或盡係新買屯田或中有混襍民田屯田見在之利收放若干民間隱射正糧若干一一按冊踏勘明實

至以新募之兵為屯人以河西之外為屯地在
趙率教尚獲百倍之利况屯撫豈乏金城之畧
哉屯田當在用兵之處確不可易

聖明業已洞見關撫關道諸臣能導

明旨酌科議倣率教之意而實心從事牛種器具亦
非難處而滿篝滿車陳陳露積三軍可望宿飽
海內可減加派豈但漕糧可以不截召買可以不
不事已哉改解南糧原為借抵浙直漕折之數
船隻盤費未曾議免可即移之以運南糧各府

州縣廣積穀以備賑荒自是民牧最先急務前
臣部已經咨行諄諄懇切何江南之獨未奉行
乎應照科議再行申飭令南北各省直有司用
意積儲各該撫按俱照河南事例以所積多寡
為有司考覈殿最則奉行無不力而利賴將不
淺矣大通橋盤兌一節見咨督臣候查回另覆
今據該司案呈前來相應覆

請恭候

命下臣部欽遵施行等因天啓五年三月十九日具

題本月二十一日奉

聖旨是欽此

太子太保戶部尚書臣李

等謹

題為鮮運漸迫料理難緩謹再申明餉運事宜懇
勅蚤議區處以速輸輓事專理新餉山東清吏司案
呈天啓五年三月初九日奉本部送戶科抄出
督理遼東糧餉兼巡撫天津等處地方都察院
右都御史兼戶部左侍郎畢自嚴會同督餉省
直巡按監察御史王祚昌題前事等因奉

聖旨戶部知道欽此欽遵抄出到部送司案呈到部
為照天啓五年鮮運本色二十萬原議天津截

漕十萬石登萊陶撫案內入官還官撥給十萬石蓋謂取之見在不煩措處止議運費便可起行今稱登萊抵還京邊外止銀一萬三千二百五十餘兩米豆一千七十餘石共折筭米二萬四千五百七十餘石尚少七萬二千餘石雖京邊亦是應還之銀然天津本色額數已定顆粒難以措辦今春運俱已起行再向省直派買是為西江之汲且登萊最為近便應照已前充餉之

旨通融處辦以了鮮局無疑也至于運費等項五議臣謹酌之其一議運船津糧十萬石當用船一百六十隻選津船九十隻募登船七十隻前後分幫開洋以儘運津糧而登糧則以先回空船隻運之省九十隻運船且省九十船押運官員廩餼花紅省九十船蘆蓆板片計無善于此其舊年回空迄今不到未知有無實收到津是否官造船隻相應行查實落運官船戶依法處治以為將來之警可耳一議腳價津糧抵鮮每石

例該四錢二分計糧十萬石該銀四萬二千兩
此當于臣部給發聽津部差官赴領登糧抵鮮
每石例銀一錢七分計糧十萬石該銀一萬七
千兩查登萊有應解臣部新餉即于此中扣留
以充運費且省彼此解給之勞亦計之便者也
一議運官自津抵鮮水程甚遠苟押運有功不
至差池失風不至浸漁掛欠不至回空遲悞理
應列薦上年舊例可循今年以一官而押津運
復押登運誠有兼人之苦俟運事報竣之後查

無事過即破格擢用在津部照例薦揚之耳一
議布疋前年鮮運原議有布疋一項今布照舊
以二萬疋為額布價亦照舊以四千五百兩為
額毋容再議至運官廩餼船戶花紅及席片等
項共銀二千亦照前于臣部給發毋庸再議者
也一議糧價除津運出于截漕其價自不必論
登運若取之賍米價亦可不必論今既不可得
而責其召買補足則舊年五錢一石之例在也
若得稍減原價猶見樽節之功即能通融處置

作速買完以無悞運期事竣之後津部固不妨
一字之褒若慮糴本猶在半虛半實則充餉之
旨昭如日星並未奉有抵補京邊之

命該地方官自不得枝梧推諉以悞運務萬不得已
即聽借用別項以俟追贓補還至于遠民餓莩
登撫近得全給一年之

旨可以即民為兵即賑兼守金州旅順可城遠民溝
壑可起登撫應自有方畧也既經題
請前來相應議覆恭候

命下臣部移咨津部將運價等糧四萬八千五百兩
差官赴部支領咨登萊撫院轉行各道府將應
買補糧七萬二千餘石速買候運腳價一萬七
千兩即于登州新餉支用施行等因天啓五年
三月十九日具題本月二十二日奉

聖旨是欽此

太子太保戶部尚書臣李

等謹

題為摘陳地方切要事宜仰冀

聖明加意處分以安重地事專理新餉山東清吏司
案呈天啓五年三月初七日奉本部送戶科抄
出巡按山東監察御史魏光緒題前事內稱一
曰登州之加派宜核也登州濱海斥鹵之區山
田饒确從來五畝折一故地雖儉而賦不甚重
今戶部按畝加派加者反浮于正額之外向來
道府各官苦心樽節幾抵其半今且無可抵矣

臣意

國家當困窮之時必不肯輕為罷免必不得已量于鑄錢餘息及泰山香稅內酌量湊抵若干未知果屬可行否等因天啓五年二月二十七日奉

聖旨該部院知道欽此欽遵抄出到部送司案呈到部看得小民之苦于加派也不獨一登郡然國難方殷法非得已故加派之政雖嚴而抵補之令亦時下兼紀錄設法免徵者以為撫字之勸

令民牧則而效之或亦可寬小民萬分之一登州地瘠民貧九厘加派既屬難堪而則壤均賦未可以一登獨邀寬政御史深念民艱

國課難以兩全無害議將鑄錢餘息泰山香稅酌量湊抵所以為登民計者至矣但香稅原有額解正供必須正額解足外方可動抵鑄息前曾議抵加派又議抵雜項今稍分以抵登派要亦無不可者在該省撫按藩司酌而行之耳其樽節抵派道府各官誰為全抵誰為半抵查明報

部以便照例紀錄既經題

請前來相應具覆恭候

命下臣部行文山東撫按藩司欽遵施行等因天啓

五年三月十九日具題本月二十二日奉

聖旨是欽此

太子太保戶部尚書臣李 等謹

題為

大工緊急借銀宜還懇乞

聖明嚴諭速補以濟急用事專理新餉山東清吏司

案呈天啓五年三月二十日奉本部送戶科抄

出工部署部事本部尚書仍管侍郎事白所知

題稱先年初建

殿門蒙

皇祖分稅銀一半助工自萬曆四十四年十一月內

戶部因薊門兵變題借本部庫銀二十萬兩分
密雲甘肅等鎮四十六年遼事緊急戶部又借
過銀四十萬兩今

大工肇興本部急如星火伏乞

勅諭前借銀兩如數刻期補還等因天啓五年三月
十四日奉

聖旨大工肇興各衙門借過銀兩務要如數刻期補
還以濟急需其各省直料價銀兩并着該撫按勒
限督催解部不得遲緩悞事欽此欽遵抄出到部

送司案呈到部諛臣看得天下之財皆

皇上之財也支度營繕皆

皇上理財之人也有餘不足權宜而用之先後緩急
斟酌而償之皆以急公之誼效之

朝廷之上豈其為一身一家計哉先諛萬曆四十四
年臣部以東事之急借過工部銀二十萬兩四
十六年又借工部銀四十萬兩維蒙

皇祖之俞允實感司空同舟之至誼頃

殿工鼎建繕司掣肘工臣即口不言德義不索還而

臣未嘗不如負刺况其以借銀宜還

告耶願臣部今日之苦百倍于工部榆關之餉日益
黔蜀之餉中分目今因旅順之失又復議增兵
餉新舊之餉額缺者不下數百萬臣已補牘告
急冀塵

睿覽而工臣請還之

旨下矣惟是臣部誼不敢後于工臣獨計臣部于工
部亦有彼此之銷筭今工部既言之矣臣何敢
默查臣部原借工部銀六十萬兩後談工部取

去銅及銅錢共計銀三萬二千兩又動支臣部
浙江稅契事例銀七年每年五萬兩共計三十
五萬兩除二項外止欠工部銀二十一萬八千
兩及查萬曆十四年起至二十九年止工部以
織造袍段于浙江那借過本部京邊銀二十
九萬二千七百有奇原議三次解還後議扣留
工部未解錢糧抵補至今未見清還如此則是
工部之于臣部其所借欠尚多銀七萬四千七
百安得復向臣部索借哉是又在工部留意無

爽前言今日者工臣徒以覬望不日之成兢兢
一木之懼遂未及察耳然臣部若非東西告急
脫中可虞亦不敢言及此也伏乞

聖明裁察念臣部所借工部銀即多工部所借臣部
銀亦自非少明諭工部各相清美

大工之餘仍令還臣前借段價以備急需倘徼

皇上寵靈即日東氛可靖臣于

殿工尚願竭助數萬以效犬馬萬分之一以明臣等
子來之心以忠于

聖明也臣部幸甚封疆幸其相應題覆恭候

命下臣部欽遵施行等因天啓五年三月二十四日
具題本月二十七日奉

聖旨據稱互借銀兩着戶工兩部對筭明白具奏欽
此

太子太保戶部尚書臣李

謹

題為帑藏日匱一日度支日難一日謹據耳目見
聞稍可裨益 國計者上陳乞

賜允行以補缺餉以救時艱以圖永利事照得方今
國家東北疆土未復西南敗衄繼聞奏凱無期兵
餉日增加派則民之膏脂已盡搜括則官之箕
歛已窮兼以水旱之災頻歲不絕閭閻之間十
室九空四方正賦每年告逋九邊軍士經年枵
腹邊塞之事如火厝薪臣謬司邦計日凜凜焉

付托不效是懼切思自昔理財之政莫過鑄山
煮海項鼓鑄之設諛署部侍郎請行海內請
勅專官建局淮揚鑄本取之兩淮鹽政內新割沒挑
河倉鹽等銀亦既得

旨行矣願鹽政之可酌議與所當清查者猶不止于
割沒等項臣謹據臺省諸臣所陳及臣所得之
見聞者一一臚列為我

皇上陳之一時

朝臣無不蒿目體

國矢心殫畫在科臣郭興治目前緊要無過理財
用人一疏則曰如鹽政一事聞兩淮之內有補
庫折價銀有行積引食鹽銀不過一清查可得
四五十萬又聞有南北綱割沒銀新舊引割沒
銀亦不過一清查可得銀四五萬至于關引行
引加帶挑河種種名色不知幾十餘萬以兩淮
推之長蘆河東可知也以前件推之別項沉沒
可知也與其徒飽鹽官鹽役之腹何如取作養
軍養馬之費此自然之利所當細為搜剔者也

在臺臣崔呈秀欲求保泰之策一疏則曰廣積儲之計其要莫過于通鹽法惟鹽法新舊不通則鹽壅而課亦與之俱壅財于何出鹽法諸臣廣為變通之術歲可收利百倍蓋科臣言其槩而欲臣部舉其詳臺臣身嘗試其事而所言故為親切既奉有搜括見在細加查奏及鹽屯鈔錢談部覆行之

旨矣外又有謂網法行盡應補行積引上納餘銀以助新餉淮南舊引歲行一十萬淮北歲行七萬五千自丁巳至丁卯淮南舊引行盡舊商套本全收淮北舊引尚待四五年可以補行今淮南宜補行積引另招新商認行蓋淮南有扣留加帶止可每年鋪行十七萬引此銀即名新餉此商即名餉商其淮南補行積引即接續圍網行鹽每年仍附行扣留三萬引待扣留行盡方准附行加帶各商餉銀既輸仍當遵

旨許帶鹽十六斤以償商本所有淮南商人姓名編定冊籍具題開列挨年輪套每引在部先開徵

銀貳錢仍將花名冊籍咨都察院行兩淮巡鹽御史轉行道司奉

旨找徵訪知兩淮有等奸罔豪賈動以新舊引窩誤認已窩不知套本既收此窩理應歸還

朝廷誰敢執為已有今本部採訪臺省疏議搜括項下咨行兩淮招商承認以助新餉今王秉衡等已赴部認行淮南十七萬引本部業已奉

旨准納銀造冊咨行兩淮淮南商中敢有奸罔豪賈把捏

朝廷如許重大利權暗行糾合走空積棍指稱占窩妄捏條議假公濟私紊亂部法本部訪出定指名叅奏以阻撓鹽法究遣仍以逆

旨籍沒兼併家產充餉其淮北新舊引窩仍歸北商不許南北紊亂此法之行雖加課非加引也其引數仍綱冊之舊引也亦非加鹽也其鹽仍照綱冊淮南減定四百三十斤淮北減定四百五十斤者也不然鹽斤引數一有改易即引鹽俱滯矣有謂行加帶納餉銀以清積課兩淮加帶

之盜自寧夏之變始係餘銀外每引加納一錢許隨正盜附帶斤重自設疏理以來方議減斤疏引何得又附盜斤是以加帶積課至今未銷以舊引餘銀筭共計淮南加帶盜有十二萬餘引淮北加帶盜有七萬餘引值此網法將終似應議行但用舊引之盜餘銀既減引價又賤其賣水商獲利則與新引無二合令每引納餉銀一錢解京又必清查納銀不許抵納別項亦不許借派新窩以開弊竇也有謂南北網盜新舊

割沒銀兩務盡入歲解兩淮每年七十萬五千一百八十見引每引徵餘銀八錢應徵銀五十六萬四千兩有零每歲春秋二解餘銀該銀六十五萬五千兩除見引徵銀外割沒湊解餘銀應用九萬四千兩已足解額正數查得南北各網盜過所新割沒不必每引二錢為限蓋有不便商者二一則滋奸人夾帶私盜有壅正課一則良商虛賠割沒大約每引以一錢四五分為率計每年行新舊引九十餘萬例有新割沒銀

十三四萬兩除奏正解每年常餘新割沒銀四萬兩又舊割沒銀除挑河募兵公費外每引四分五厘筭又應餘舊割沒銀四萬兩二項每年應餘銀八萬餘兩查此項銀節年運司雜科吏書併廣盈庫積書積吏或私雕假印通同奸商擅改庫簿虛作實收或覓收不納將引盜出私付走司積棍瓜分侵沒已經監院樊 批委譚運同張運副清查實有的據不知已追若干未追若干今本部除年遠者姑不究外應自元年

起至四年止除奏正解併樊院准補商人折價逃亡外共仍存若干一併解部以後此項另批起解不必又以奏解為名致奸胥藉以侵沒凡一切書工賞賜俱不許擅動此銀倘有索取本部不准支銷向知雜科積書併道書經營餘銀書辦每解餘銀通同奸商瓜分月利坐閣不納希圖羨餘割沒閃躲奏解今新舊割沒本部俱盡搜括另款項下助餉每解徵收餘銀之日開徵次日道書即查徵收餘銀冊逐名清開要見

某商完徵某商掛欠若干明張告示揭之運司
通衢二限不完者即鏟削新窩永不許行另招
新商頂補如今歲乙丑淮南北新舊併食鹽割
沒本部另題巡鹽御史復命冊內務要堯底清
查造冊報部以便紀錄優擢凡一切侵盜擅動
積弊俱無從下手其納割沒實徵關防全在放
引向知所書作弊有等奸商行賄竟將引目從
所內暗發運司自天啓五年起立一印信堂簿
所內解引到司行經歷司吏書先逐名清查從

某商起某商止解引到司共幾百幾十封務要
對磨解批比及納銀之時廣盈庫吏書一面收
銀一面給放小票付商應給引目經歷司吏即
在印簿上明註某商某日納銀某日發引以便
與收銀紅字堂簿相對必如此嚴為關防庶杜
侵盜之弊運司掌印官當加意提防自為官箴
惜可也有謂查解補庫折價銀兩食鹽不支改
納折價自辛酉年起奉

旨每年額徵七萬搭解充餉則已前徵解之完欠與

議補之款項安得不問查議補疏內原云積至十年即可總解太倉老庫今第自丙辰至庚申五年共諉有折價補庫銀三十五萬兩蓋舊積者既可充解于先年則議補者豈宜復留于外府應行彼處廉幹精明有司查取原日疏理道中所設立折價循環簿同解批庫收呈驗倒換逐年原額完欠昭然將司報見貯此項銀數磨對照合即百弊立清如係奸總覘收不納庫書假借侵用及分司市恩不催致此項空缺則自

有三已在也有謂查解行積引食鹽餘銀食鹽用引分行正積自設疏理始行正引食鹽如上元江寧句容高淳溧水江浦六合全椒八縣乃同綱鹽春秋兩季收納餘銀起解無容別議若見今行積引食鹽如靈璧虹縣溧陽江都山陽清河桃源宿遷邳州睢寧海州贛榆十二州縣每年約引共三萬四千有餘計納銀一萬九千餘兩在庫庚申以前未議裁減歲納尚多今自丁巳迄于甲子合行該司開載某年某縣行額

引若干收納餘銀若干同銀起批通總到部以
後歲納歲解當不復聽其侵那也有謂查歸舞
陽行蘆鹽以塞私販查鹽法誌載南陽府屬舊
多係行淮鹽地方後俱陸續改食別鹽獨留舞
陽一縣以其河道相通耳查原額派六千引近
縮額亦不能銷此繇四面環遠盡食蘆鹽價賤
易售道近易運就賤就近亦人情也既空懸食
淮之名又開私販之路今宜行道司查議亟歸
屬長蘆照額六千引增課五千兩庶商民之樂

赴而國課亦無虧矣有謂定京掣期杜零星
影射京掣係鹽運第一關頭水內二商俱繫脉
於斯自立綱以來議九月十五夫既云年運年
消胡縮期三月所以年來內商掣運不及名曰
九月十五京掣不過懸此空名院道守催浦口
延至九月念五開掣不過十五萬引勢不得不
零星京掣此中不知暗滋多少夾帶弊竇查得
淮南產鹽場分名曰三十場其實產鹽之場不
過富安安豐東台河梁梁五場而已其餘場

分每年量出些須僅止煎辦上倉正課又供串
兒私販通江法之不行從來久矣夫以淮南綱
食百萬正課五場煎辦勢必不能取充於一時
又兼出鹽月分十一月至正二月地氣冰凍未
解一鹽不出三四五月漸出毛竹花之鹽矣五
六月內或天氣亢陽地氣不和又不出鹽必待
八九月秋旺始大產鹽此時內商鹽多未出場
而院道已坐守浦口京掣即神運鬼輸能乎兼
之重捆出場過壩過橋過關揚垣上堆下堆過

所解捆已費幾許時月又兼五場有數小船安
豐等場至高泰二州水湖往還一千六百餘里
勢必裝運前者而復載後者此船隻又不能一
齊速運又兼新引過淮本年運鹽本年四月尚
無一引到淮各商憑何支運由斯以觀京掣勢
必不能九月十五結局所以愈速愈遲愈零星
私鹽愈為夾帶近查壬戌之鹽應癸亥九月京
掣者甚至次年五六月長江揚帆未盡迴視九
月京掣僅隔兩月成何法紀又甚至高淳溧陽

上元江寧江浦六合全椒等縣食鹽俱至儀真垣內併河口捆載小包夾帶江楚各縣消引不過賄通吏書塞責所以年來諸奸告增各州縣裁革食鹽弊正坐此京掣零星釀禍如此之甚正課之不能疏通水商之不能近利皆由法紀之不嚴肅今議萬不得已合再議下兩月務期十一月十五開掣十二月念五止掣如過期限在年內者每引議罰納餉銀二錢姑與年內行鹽若延出年外不論幾千幾萬斷不許復准掣

驗須銃引沒鹽變價解部仍行削窩永不行鹽至于封橋封關封所一併約期毫不假借切不可許委鹽道續掣以滋弊竇庶京掣畫一而奸頑知懼矣今當立法之始定期年掣年運年消應大張告示曉諭諸商各遵守法章無臨期延遲自貽銃沒仍聽鹽院轉行江楚鹽法道一併奉旨遵行再不許零星請掣以滋弊竇可也有謂邊鈔給價預關引目八鎮勘鈔預中鹽糧原議四月十五煞總今每需之秋杪與其限示空懸孰若

法在必信應照原日部議寬假兩月以六月十五為煞總定期但投鈔一緩關引愈遲恐悞京掣當查照原日部議預關引目一欸于每年勘鈔未齊之先如明歲應用引目今歲十月之內運司豫給每引紙價三厘三毫約止二千餘兩批差司吏協同店戶先赴南京部科投納召商買紙刷印整齊惟俟勘合到齊煞總隨將八邊字號開報到部一填即發廢引可速到掣可如期至預借紙價邊商到日一同勘合投司補納

有謂查新舊引各食鹽割沒宜添入歲解案查兩淮南北見行新舊引各食鹽約有八萬餘引每年秤掣割沒應納銀兩原無別項開銷應自丁巳年起至甲子年止挨次查明造冊要見某年某縣食鹽若干某商割沒鹽若干斤納銀若干兩同銀起批解部查收可也有謂查議舊引行盡用積鈔關引查兩淮舊引編綱計有三百四十萬自丁巳至丙寅十年淮南銷引二百萬盡矣自丁巳至己巳十三年淮北銷引一百四

十萬盡矣見今淮北缺少舊引屢將榜派南引
告改北場况兩淮積鈔年年窺伺各鎮過期到
遲鑽撓新鈔關引異圖倖收獲利致新鈔坐閣
下年以苦邊商今應速行清查不論在內在邊
責令盡數報出挨查字號明白每引輸餉銀五
分約有百萬計銀五萬兩隨正解濟邊許關引
目每張刊印積鈔字樣大紅戳分別新引儘應
行綱鹽舊引補用餘俟各食鹽照定價四錢陸
續買補支運如有隱匿復來營求混入新鈔希

圖撓奪一一以法繩之可也諸所條議鑿鑿有
據然大要不出兩臣搜剔變通二語但照鹽庫
乾沒其來已久弊孔既多謗言易起堂堂巡鹽
之身史無不羶途引避誰肯屑屑下與運司諸
官美入秋毫清其顛末所以運司諸官狗偷鼠
竊恬不知畏向臣部尚書李汝華曾查取兩淮
漲綱補庫割沒等納銀四十萬兩而運使孫毓
英者乃以未徵搪塞欲移之正項以便隱射侵
漁迨汝華特疏叅處奉

言部奏疏
旨嚴究乃始解入前銀今諸所條上何啻百萬然恐
運司之為毓英者不少矣伏乞

皇上裁察即如

廷議差一廉智大臣徃重其事

畀以專勅督理天下鹽筴錢法臣部差一司官為之
贊理令就彼中權宜行事一一搜別變通或將
二三十萬兩以為鑄本其餘盡令解入臣部以
補缺餉產鹽之地非獨兩淮而長蘆河東以及
兩浙及各省直皆可類推信有如科臣所言者

伏乞

皇上嚴勅各處巡鹽御史與鹽運司官各搜索上
聞候

旨下部臣再加調停酌而行之如今日有事則以佐
餉日後事平則每歲解入太倉以備不時之需
一年可得百萬十年可得千萬又何至帑藏空
虛凜凜如今日也哉等因天啓五年三月二十
二日具題本月二十五日奉

聖旨這搜括等項銀兩數多有裨國課便會議停妥

着實舉行專勅廉智大臣一員往督其事巡鹽御史暨運使司官也要搜索一體急公共濟時艱不許仍前隱匿乾沒自取罪戾欽此

太子太保戶部尚書臣李

等謹

題為恭報拿獲大夥劫鞘強賊屢勘已確依律正罪計獲贓銀四千八百餘兩畱充延鎮軍餉乞勅戶部於應解年例銀內照數扣存以抵遼餉事專理新餉山東清吏司案呈天啓五年二月十七日奉本部送戶科抄出巡撫延綏等處地方贊理軍務都察院右僉都御史翟鳳翀題前事等因天啓五年二月初十日奉

聖旨該部知道欽此欽遵抄出到部送司案呈到部

諛臣等看得沙河之被劫也原係陝西之餉而
其行劫者又係西省之賊夫以嘯聚四十餘人
之衆雄行二千餘里之遙撫劍一呼二萬餘金
殺而奪之為謀不為不深為禍不為不烈矣罪
大惡極固宜天殛之速而難逃于恢恢不漏之
網者今相繼緝獲已得二十三人矣追出贓銀
已得四千八百一十四兩二錢二分矣情真罪
當難免上刑之服應梟示應徒杖及應後至而
誅者俱依撫院議處其彈力緝寇如同知鄭師
玄所擒強賊盡出其手宜加

特典以勵有功巡撫宋槃副使徐紹沅同知孫誥等
嚴緝協拿不遺餘力併應敘錄俱依撫院議優
外惟是以四十餘人之衆今甫獲其半而可徑
置之如遺乎二萬有餘之銀今尚未得五千而
可徑無着落乎前保定撫院張鳳翔疏開各賊
居址明如指掌而廼元惡罪魁假官行劫之王
才洪同惡相濟殺人于貨之回賊麻四等八名
王汝務楊三白汝實狼牙焦贊二刀毛王禹一

規針王改劉二甄三李應顯梁有才等經今一
年有半尚稽天誅豈真南走越北走胡而不可
究極耶查中多晉人居晉地晉撫似不得辭其
緝獲之責矣舊時解官魏訐呈稱除道傍遺下
三起收拾外實失銀二萬一千一百五十兩今
賊口咸供三百七十六錠止銀一萬八千八百
兩其無着落之銀尚諉一萬六千三百三十六
兩零除原令地方賠補外尚宜作何區處務得
其平乃可事宜早結不得再為觀望以致曠日
持久而漫然寢閣庶緝獲日益急而奸盜日益
知警也相應覆

請恭候

命下臣部行文談撫將王大禮等各依擬處決其所
追贓銀准與兌畱以充年例行文山西撫按嚴
拿王才洪等務期必獲再行陝西保定巡撫酌
議速賠以濟軍餉臣等可勝待

命之至等因天啓五年三月二十九日具題四月初
二日奉

聖旨是強賊王大禮等依擬處決已追贓銀留充
餉其未獲王才洪等行與山西撫按嚴拿務必
獲再行陝西保定巡撫酌議速賠以濟軍需欽此

太子太保戶部尚書臣李

等謹

題為榆關需餉至急省直額解愆期匱乏可虞急
緩宜創俯循職掌仰祈

聖明嚴勅撫按司道速為催解并申飭考成之法
分別完欠以勵臣工以無悞軍需事專理新餉
山東清吏司案呈天啓五年三月初四日奉本
部送戶科抄出督餉省直巡按監察御史王祚
昌題前事等因天啓五年二月二十六日奉

聖旨遠餉係關門急需這省直拖欠數多的着該部

照例議處還行與各撫按嚴督司道催解濟用若有設法先完的即與紀錄優擢欽此欽遵抄出到部送司查得疏內拖欠新餉及勸懲等事已經本部屢疏督催并另疏查叅責令司道嚴督完解外其請委巡視新庫一節相應具覆案呈到部諛臣看得銀庫之設科院巡視者重事權慎出納嚴稽查也太倉節慎俱已有之其來舊矣新餉銀庫創于泰昌元年所以獨無巡視者以新庫錢糧與別庫不同邊鎮追呼疾于星火軍

士待哺急若沃焦一有外解到庫委官立等稱兌司庫登時給發曾不得頃刻少待若巡視科院斷不能與司庫者常同朝夕苟時至時有不至必俟其至而後乃收發未免濡滯而悞軍國且本庫出入惟是軍餉並無別項供應可議若設一官添一衙門未免又增一番衙役并增一番供應諸費所以特設督餉御史亦止于外之省直嚴其督催于內之管鑰查其收放一分之入必于餉院掛銷一分之出必于餉院掛銷各

處倒換循環投報文冊以及該院清查
奏繳與別庫巡視規格一體其亦實寓巡于督之
意也今督臣因鑒于譚主事之被議也而請另
立巡視以資彈壓不特為司庫杜多口抑且為
軍

國收實效其慮甚長但另設一巡視總不出督餉
御史之職掌以為承行而以兩御史監一新庫
無乃過重乎若有應行事宜是在督餉御史操
其太阿以相表裡似不必外求于巡視也相應

題覆恭候

命下欽遵施行等因天啓五年四月初四日具題本
月初七日奉

聖旨是考成之法務着實嚴行巡視新餉銀庫科道
不必另委欽此

太子太保戶部尚書臣李

等謹

題為 帑藏日匱一日度支日難一日謹據耳目
見聞稍可裨益

國計者

上陳乞

賜允行以補缺餉以救時艱以圖永利事專理新餉
山東清吏司案呈天啓五年三月二十九日奉
本部送戶科抄出本部題前事等因天啓五年
三月二十五日奉

聖旨這搜括等項銀兩數多有裨國課便會議停安
着實舉行專勅廉智大臣一員往督其事巡鹽御
史暨運使司官也要搜索一體急公共濟時艱不
許仍前隱匿乾沒自取罪戾欽此欽遵抄出到部
送司案呈到部看得

國家東防西戰此索彼討軍興浩費極矣時當三
空四盡出多入寡財用匱乏極矣求可裕

國計莫過於鼓鑄求可以佐鼓鑄計莫過於鹽筴
臣疏於鹽課搜括通融從衆議也仰遵

明旨復加會議衆議仍復僉同謂藉巡鹽御史風裁
力事搜索所得必多則先盡用之鼓鑄餘以
解部實正大生財之道足救目前然眉之急其
鼓鑄建局或謂揚州便或謂荊州便蓋揚州為
運司駐劄之處搜括鑄本也易故揚州便荊州
為巴蜀接壤之區收買銅鉛也易故荊州便揚
州商賈萃集水陸交通荊州湘江上流四通八
達於以節制各省廣行鼓鑄恐無軒輊第荆楚
之人執謂荊州不如揚州便江淮之人執謂揚

州不如荊州便見微覺於分歧言有同於築舍
鹽筴錢法事體既大利權亦重即臣部難於遙
度應俟差有大臣自為裁往至於

專勅大臣在 廷諸臣孰饒心計孰為智廉事在銓
臣彼其夾袋應不乏人伏乞

勅下吏部即日會推大臣一員前往督理臣部仍差
司官一員佐之庶鼓鑄早行一日

國課早裕一日而軍興利賴非淺鮮矣等因天啓
五年 月 日奉

聖旨

太子太保戶部尚書臣李

等謹

題為榆關夏餉缺額外解愆期可虞懇乞

聖明嚴考成清冒濫以救目前以裕軍儲事專理新

餉山東清吏司案呈天啓五年四月二十五日

奉本部送戶科抄出督餉省直巡按監察御史

王祚昌題前事等因天啓五年四月二十日奉

聖旨這本說的是拖欠錢糧數多着嚴立考成之法

道府州縣官俱不准考滿陞遷其有朦朧考滿陞

遷者本官削職罪及撫按稽查兵馬虛冒專責巡

關御史名色將官亟行汰革該部即與覆行欽此
欽遵抄出到部送司案呈到部該臣等看得裕
餉之策無善于考成之嚴冒濫之清頌兩者臣
部行之已不遺餘力即近奉會議之

旨諸在廷之臣為臣部持籌議亦僉同然行之欲核
責之欲要力行貴速非藉

天語申飭不能警醒積玩人心餉臣與臣部誼切同
舟慮周偶語疏上幸荷

嚴旨查四年省直加派尚欠九十二萬雜項尚欠一
百四十萬其在二三年者欠亦不少餉臣欲查
各省直州縣拖欠之分数為一府之總數該臣
部查得浙江湖州府三四兩年共未完一萬四
千二百兩台州府二三年共未完三萬二千
三百九十一兩金華府二三年共未完一萬
九千三百一十九兩處州府二三年共未完
一萬四千八百一十九兩江西省南昌等五府
舊欠四萬七千兩零四年全欠山西元年以前
并二三兩年共未完七萬有零本部屢檄嚴催

諛司置若罔聞毫未起解四年分未完二萬四
千九百八十九兩陝西省三四兩年共未完七
萬七千五百一十二兩零廣東省四年未完三
萬七千四百八十六兩南直應天府元二三四
共未完四萬四千二百三兩零蘇州府四年未
完六萬三千六百六十三兩零松江府元三四
年共未完四萬三百餘兩常州府四年未完四
萬二千八百三十兩零鳳陽府元年四年共未
完五千四百八十二兩零淮安府除三年解津

外其元二四年共未完一十四萬五千一十九
兩零以上共計一十五府四省應如餉臣所

請仍照前任尚書李宗延叅罰之法未完三分以上
該府掌印官立便糾叅離任赴部降調未完三
分以下各府印官一面住俸候解完另議今姑
限六月內通解清完以結前四年之局如六月
不完容臣部會同餉臣照例叅處目今五年春
夏季限七月內通解秋冬季限十二月通解倘
不如期亦照例叅罰臣向督撫秦中時曾具題

謂錢糧應責重守巡談道以守巡道所轄者十數州縣地密而親權專而覈無論征輸之法可與州縣相調停即搜括之令亦可與州縣相商確故頃復以入

告餉臣有當臣言請將省直守巡兩道並入考成一體叅罰不准給繇推陞蓋非寬之藩司糧儲而嚴之守巡也自州縣而郡守守巡糧儲藩司遞嚴而遞密庶上下有以相成而好義有以相激耳至若榆關兵馬以十四萬計其中占役逃亡

倒斃虛報誠有如餉臣所言者所望巡關御史責成監軍道臣令其稽查數目造冊報部庶幾始一清查可以扣銀還官再一清查可以不補減餉其所省于金錢不啻數萬夫清兵可以足餉而因兵以及官其可議汰者更多彼各衙門劄委守備千把總等官本非六郡之良奚當才官之選聞有以一匹之夫空手出塞毫無斬將擐旗之功至饒金帛子女之享漸為叅遊之陞則餉臣所稱徒以充債帥之囊者非此輩而誰

繇此言之裁一將官當不止留十兵之餉已也
夫餉臣以考成之嚴責之守巡兩道而

俞旨曰本官削職罪及撫按餉臣以冒濫之清責之
監軍道臣而

俞旨曰稽查兵馬虛冒專責巡關御史蓋道臣職詳
事可綜核而撫按權重威可彈壓此

聖明無以責之所為周悉征科整頓將士俾宇宙有
樂輸之餉塞上無糜餉之蠹振起玩愒之習絕
去情面之私另有一番更新之象在此舉矣既

經題

請前來相應覆

請恭候

命下行文吏部凡遇陞遷道府州縣及考滿各官移
咨臣部查無拖欠錢糧方准題

請不許朦朧及行文各省直撫按嚴行守巡道府依
期完解違者一體罪及并行關撫及巡關御史
將名色將官槩行裁革倒過兵馬徹底清查不
許仍前混留營伍虛占數目行令監軍道每月

造一簡明文冊報部要開某鎮某營裁革某官
幾員汰減冗冒清出逃亡兵馬各幾千百十名
頭匹見扣還官銀若干下月應減餉銀若干務
令兵精餉裕不許仍前藉口補募致滋夙弊庶
兵餉兩有責成而軍

國寶與嘉賴矣等因天啓五年四月二十七日具
題本月三十日奉

聖旨是欽此

太子太保戶部尚書臣李

等謹

題為狡奴窺伺告棘饑兵餓斃脫巾內憂外累萬
分可虞懇乞

聖明亟

勅該部速發糧餉以救然眉事專理新餉山東清史
司案呈天啓五年四月二十七日奉本部送戶
科抄出巡撫遼東山海關等處提督軍務都察
院右副都御史喻安性題前事等因天啓五年
四月二十六日奉

聖旨饑兵待斃情急着該部速發糧餉以濟然眉欽
此欽遵抄出到部送司案呈到部該臣等看得
東奴竊窺西虜挾賞榆關事勢危急極矣正惟
是餉足兵強如雨如雲千城屹于以固捍衛
而圖恢復願可令其枵腹待斃不戰而死乎在
我所以養士者謂何彼其脫巾偶語憂在蕭牆
所宜長慮而却顧又無論矣今

皇上垂念危關

命臣部速發臣敢不極力轉輸以圖接濟然無如望
眼欲穿外解不至庫罄如洗何故臣昨萬不得
已因而乞貸問寺又不得已而

請發內帑非徒曰智窮能索聊為持鉢之求實以四
盡三空本無點金之術誠如撫臣所稱軍饑于
營士譁于伍一旦變起呼吸饑軍潰內強虜乘
外此時即碎臣身其亦何救于存亡危急之數
乎該臣嘔心益政借籌會議見蒙

俞允大臣鼓鑄然計鑄息到部已不啻西江之水即
臣與督餉御史疏

請檄催于各省直遠難即應度必六月始至即欲勉
諭三軍以苟延殘喘不得而况可責之執戟荷
戈哉內憂外虞撫臣即未言而臣心已如炙矣
伏乞

聖明憐答臣部目前之艱與塞上倒懸之困仍望
慨發帑金數十萬兩容臣于秋成外解到部之日照
數

進還決不敢仰負

聖意禱乞

申諭罔寺責以同舟之誼即遵昨

旨那借十萬兩俟臣部稍裕刻限清償臣部將此二
項立解關上沛發

皇仁使三軍頓懷挾纊之恩猛起投石之勇至于竭
力清汰廣開屯種以裕將來則在樞輔撫臣而
下同心體

國共卹時艱臣所為私切傾耳庶幾望之者也等
因天啓五年四月二十七日具題本月三十日
奉

聖旨內帑匱乏已有旨着同寺發銀十萬兩你部還
作速設處以應急需欽此

太子太保戶部尚書臣李 等謹

題為 大工緊急借銀宜還懇乞

聖明嚴諭速補以濟急用事專理新餉山東清吏司
案呈先該工部原題本部借銀六十萬已經本
部題覆工部曾借去本部前後銀共六十七萬
七千七百有零除抵扣外尚多銀七萬七千七
百兩則借過該部六十萬兩自應彼此銷筭見
奉

明旨互借銀兩着戶工二部對美明白具奏遵行間

隨准工部移咨內稱該水司云萬曆十四年起至二十九年止所借浙江京邊二十九萬二千七百兩為本部應出夫其所云十三十四十六等年欲作為戶四工六之說此猶曰比照萬曆四年規則猶可言也若二十九年那借者明係為借本部之銀至今浙江此項京邊缺而未解安得不謂之借若云是本部應出則本部萬曆四十六年所用工部四十萬奉

聖旨既稱遠餉匱乏已有旨准將張燁馬堂胡濱丘

乘雲潘相徵收分進內帑及解工部助大工稅銀暫解戶部一年以充軍餉募兵之用欽此則本部此項遵

旨止言解用亦不應作借矣今工部乃獨引兩部會議

朝房之說及本部遠餉中斷之疏以証本部之獨為應還不知會議之時本部止言東事底定願助大工未嘗專言

大工興而後補還也遠餉中斷之疏止言工部以

補還先年借過六十萬請亦未嘗自言本部之
為借為應還也况本部覆疏業言天下之財皆
皇上之財度支水衡皆為

皇上理財之人有餘不足權宜而用之先後緩急斟
酌而償之數語亦已盡矣目今

殿工鼎建若本部稍裕即當稍效涓埃之助畧紓臣
子之義又何敢以借與還為言而無柰本部目
前之窘關係

國家安危則又非工部比也以榆關則缺三月餉
二十餘萬而四月尚未給矣以薊密則缺春季
年例二十餘萬且有飛語入京嘖嘖偶語沙中
矣而九邊與黔中積欠已踰百萬本部即剝膚
磨髓無以應之此亦工部所知也故今日所爭
者事勢之窮促而非敢拘拘辨應借應還之是
否所幸諛司既藹然同舟之誼諄諄以平心見
諭本部何敢不惟力是視若大工未即告竣
本部自當勉強湊處以助萬一誠以

皇上之福社稷之靈即日東平西蕩則本部亦可

即日設處百萬以為庀材鳩工之用亦不敢僅
如工部所索區區借還而求與對筭矣總之
大工邊餉俱為

朝廷之用三空四盡同為兩部之艱筆封疆之固正
所以奠

皇居之安凡為臣子尤當念也相應咨覆案呈到部
擬就行咨及咨工部工臣以註籍不收昨閱邸
報忽見工部遽已具

奏謂臣部未見回咨隨奉有移咨戶部催取之

旨不知該部實據一面之筭于兩部對筭之

旨似未免于草率今該臣部覆覈如臣部之六十萬
金應還則工部之六十七萬餘金亦應還如工
部之用戶銀非借則臣部之用工銀亦非借卷
案可查

天語見在臣何敢妄作支吾之言自取不直之罪乎
伏乞

聖明洞察憐臣部軍餉之繁臣部度支之匱時窮力
竭舉

朝所知

勅下兩部併將前銀各自註銷以斷葛藤目今

大工鼎興臣部同戴

高厚誼當有助容臣另于各邊餉設法節省祈效一
瓦一椽之用以竭庶民子來之誠庶舊帳新助
各自明白而

堂與疆場各相鞏固矣等因天啓五年四月二十
九日具題五月初二日奉

聖旨工部既說對美已明你部又不肯承認還着各

捐成心銷筭歸一以助大工欽此

太子太保戶部尚書臣李 等謹

題為 大工緊急借銀宜還懇乞

聖明嚴諭速補以濟急用事專理新餉山東清吏司
案呈天啓五年五月初六日奉本部送戶科抄
出本部題前事等因天啓五年五月初二日奉
聖旨工部既說對筭已明你部又不肯承認還着各
捐成心銷筭歸一以助大工欽此欽遵抄出到部
送司案呈到部該臣等看得

殿工鼎建庶民子來臣部既為度支之司敢自後消

涖之助頌工部所用臣部銀除抵筭外寔多銀
七萬七千七百兩工部既索臣部之銀臣部當
此匱乏自不得不相清筭然臣自知

大工之急亦未嘗向工部取償也即以工部為臣部
修倉一項十餘年來皆不過司庾者自行緝理
所存工部銀不知幾萬今正可輸作
大工之用臣亦聽工部之自議而未敢以
上聞也但既奉對筭之

旨臣自不敢草率是以覆覈入

告乃

明旨復以不肯承認責臣部是在工部以懸坐之教
幸徼對筭之

溫綸臣部以覆覈之詳未蒙

聖明之洞鑒臣罪何辭臣心益苦夫設法節省以效
一瓦一椽之用此臣之所自許也豈其藉口于
爭借爭還以為延挨之計况工臣亦曰俟之二
三年間未嘗責臣部以即助但互借之葛藤關
兩部之職掌豈同為

皇上之財在工部取之臣部為非借為不應還在臣部取之工部即為借即為應還恐亦非政體之平也目今東征之士枵腹荷戈呼庚待斃三四月缺發額餉以八十五萬餘計樞輔告急臣部仰屋

朝廷之上談者變色而工部刺刺不休非其情矣臣昨疏謂以

皇上之福社稷之靈即日東平西蕩則臣亦即日設處為庀材鳩工用不敢僅如工部所

請則臣區區願助之誠與目前萬不得已之心固可鑒也伏乞

皇上再賜憐答准臣部之消箕容臣部之另助庶藩籬既固

帝居益安豈但兩部不失同舟之誼亦且萬年永開有道之福矣等因天啓五年五月初七日具題于本月初十日奉

聖旨大工雖急不比餉缺燃眉卿既料理欲先其所尤急又欲另行設處助工具見苦心其工部所借

戶部銀兩筭清亦待大工完後相償欽此

太子太保戶部尚書臣李 等謹

題為 大工緊急借銀宜還懇乞

聖明嚴諭速補以濟急用事專理新餉山東清吏司
案呈天啓五年五月十四日奉本部送戶科抄
出本部題覆工部第三疏等因天啓五年五月
初十日奉

聖旨大工維急不比缺餉然眉卿既料理欲先其所
尤急又欲另行設處助工具見苦心其工部所借
戶部銀兩筭清亦待大工完後相償欽此欽遵抄

出到部送司案查本部既奉

明旨愧感無地正一面料理急餉接濟危疆一面留心設處異効微助乃昨見工部又復疏辯責備不已時窮勢迫終不相諒相應具覆案呈到部諛臣者得本部與工部清筭之錢糧邊餉與殿工緩急之次第及本部所處度支之苦與夫願助涓涘之心亦既荷

聖明曲垂憐察矣此無論同舟共濟誼不當再為陳實乃既奉缺餉然眉之

旨即宜仰體

聖明留意危關之心而工臣輒盛氣相加不勝不休一則曰巧抵蔓扯再則曰愈見支離語何屑越之甚也且臣自願助工臣部自度德量力以致之闕下

天威不違顏咫尺而何敢漫說以處此乃工臣又曰試問何項另處何時助工將誰欺乎噫殆亦易其言矣夫臣與司空比肩事

主敷歷中外垂四十年臣一木疆人耳豈能效嗇夫

喋喋利口哉而工臣出言已自不倫復以支蔓責臣何也臣前疏曰天下之財皆

皇上之財度支水衡皆

皇上理財之人有餘不足權宜而用之先後緩急斟酌而償之此數言者臣兩以入

告則臣部所以處此庶幾其平心矣况既為

皇上之財借則俱應為借還則俱應相還此亦事理之明白易見者又况今之東西何時也臣部之急何等景象也即謬以為臣部宜還而豈能還

之時乎索舊債于宴人恐必不得之數而清抵扣于夙負亦自有相償之因此不但政躰亦人情也夫人臣入

告亦自有體老成謀

國務急其先目今夔龍在列麟鳳盈庭審時度勢必有公論于此伏乞

聖明洞鑒將臣部前後所覆工部疏一併

檢發戶工兩垣覈其孰為平心與否併查抵筭之繇酌緩急之用議明具

奏庶爭端息而彼此相安無事矣等因五月二十
日具題于本月二十四日奉

聖旨關門措餉甚急助工原非刻期取辦人臣躰國
務要和衷本內事情已洞知了不必求質欽此

太子太保戶部尚書臣李

等謹

題為 畿輔東省召買綦難糧料弗至仰祈

聖明申飭責成以接濟關餉事專理新餉山東清吏
司案呈天啓五年五月二十三日奉本部送戶
科抄出督理遼東糧餉兼巡撫天津等處地方
備兵防海贊理征東軍務都察院右都御史兼
戶部左侍郎畢自嚴會同督餉省直巡按監察
御史王祚昌題同前事等因天啓五年五月十
五等日奉

聖旨戶部知道欽此欽遵抄出到部送司案呈到部
諛臣等查得原派順廣大三府買天啓五年關
運米十萬石每石定價七錢共諛銀七萬兩除
動各諛府雜項銀四萬一千二百八十兩零外
臣部找發銀二萬八千七百一十九兩零已足
米價訖原派真定府買天啓五年關運豆十三
萬石每石定價五錢共諛銀六萬五千兩除動
諛府雜項銀二萬五千一百七十六兩外臣部
找發銀三萬九千八百二十四兩已足豆價訖

又原派東兗二府買天啓五年關運米二十萬
石亦每石定價七錢共諛銀十四萬兩動諛府
加派新餉訖此初派米豆之額及米豆價值之
數也既而地方鄉紳按臣督餉院部各疏題

請災旱異常米豆價湧原議之價不能召買官民俱
病臣部於是覆議增價米一石增銀二錢其豆
有葛菽兼收每石止增價五分此已後加增米
豆價銀之數也夫價增則前銀應不足以供召
買既而關撫喻安性有關兵更調甫完一疏內

言部奏
米豆俱可減少而督餉院部遂為臣部規畫簡便之計不增銀以就米豆之額而止減買米豆以就原議之價順廣大三府止買米八萬五千五百五十五石零真定一府止買豆十一萬八千一百八十一石零東兗二府止買米一十五萬五千五百五十五石零臣亦以為此計之得而五年關運可以相安於無言矣嗣後直隸巡按御史宋師襄又以

畿南災傷不能召買請緩至秋仲奉

旨下部臣移咨督餉院部酌議而督餉院部恐緩不及事以悞海運復行文宋御史查議亦既回稱督令州縣召買轉運預定人役先期料理務於八月望前依限交納斷不令時刻稽遲以悞海運等因若然則未運尚可及而軍餉民艱兩稱便益矣臣恐粟米七月半後可以登場急急督催八月望前可以運津不至悞事若豆藟收成稍遲八月望前未必即能運津未必即皆乾燥利用九月來瀚海颶風不可不深長慮也臣

既欲體按臣寬恤

畿南生民之心又不得不念榆關軍馬糧料之急倘至不能及期以貽海運戚無論按臣一片苦心已成灰燼而待哺之卒將安救耶

畿南道府州縣諸臣戮力同心預期斟酌八月望前務要米豆晒揚乾淨一齊赴津以毋爽前約則宋御史所當早結前局也其東兗二府去年召買不前頗煩文告大抵亦苦於荒旱之故今談道府諸臣合詞呈請為連年水旱相仍俱未

有年饑民猶有展轉溝壑者若責之買米是無異求魚於木而取燧於海遂為通融之計米麥兼買之請督餉院部亦既多方以酌定之矣臣亦以為東兗無米可買此時勢之最難而欲米麥兼買亦筭計之最苦為東兗計所當曲從其請也但關門向來未曾運麥今創其事人情不免齟齬誠有如所云碾磨不便之說夫米亦未有不舂碾者則麥之碾磨止多造一磨而已非以厲三軍也况關外之兵以供進勦者則碾磨

不便關內之兵以供城守者亦碾磨不便乎上
班之兵日事操練者碾磨不便落班之兵徒事
偃息者亦碾磨不便乎且麥之果腹又甚於米
人情宜應樂從作為餅餌以備眾糧猶免炊爨
揆之事理亦無不便者於八十餘萬石之米中
而搭數萬石之麥關門道臣亦必善為處此而
不故難此東兗二府官民也至如督餉院部慮
後之議不可不詳臣再請申其說大抵人情米
賤則愿輸米麥賤則愿輸麥東兗米麥兼收

畿南定為援例今

畿南米豆已得緩之秋成矣斷無再援買麥之例
即明年東兗再欲援例亦視今年關門用麥何
如然後定奪亦不得以權宜著為定例麥最忌
濕較米多糝若係潮濕固不堪用即以一石易
一石恐亦非政體之平行令該地方必須晒揚
乾燥每石應議增耗若干以補米價不足之數
方可起運毋令解官撓和侵冒以致紅腐吐棄
而滋軍士口實米麥之額不定則該地方將任

意增損萬一麥多米少又或衆情不調後將無
及今議東充原額米十五萬石止准麥四米六
兼搭勿得過多以圖地方之便解限不定則起
運延緩有悞海運今依督餉院部限五月下旬
六月初旬通運抵津如或遲悞以至秋運將糧
多船少運不能前東充道府必難辭咎碾磨不
設軍士便將束手而有用寘為無用臣聞關門
所乏非石設磨亦非難事關門道臣一令便可
立就亦不得徒委碾磨之苦而終令召買之無

術也既經督餉院部酌定題

請前來臣部再議上

請恭候

命下行令真定按臣將真順廣大四府應買米豆准
於秋成召買定限七月半後八月半前盡數運
津以湊關幫秋運并行山東撫按布政司東充
二府應買米十五萬餘石准以小麥兼搭四分
定限六月初旬一併運津以湊關幫夏運俱不
得遲違以悞軍

國再行關門道臣加意調停酌量給發則內外俱可不苦於本色而軍民亦各有攸賴矣臣等可勝待

命之至等因天啓五年五月二十五日具題本月二

十九日奉

聖旨是欽此

太子太保戶部尚書臣李

等謹

題為恭報登兵出海之期兼陳登餉匱乏之極以祈

聖明垂鑒事專理新餉山東清吏司案呈天啓五年五月二十三日奉本部送戶科抄出巡撫登萊等處地方備兵防海贊理征東軍務兼管糧餉都察院右副都御史武之望題前事等因天啓五年五月十一日奉

聖旨該部知道欽此欽遵抄出到部送司案呈到部

談臣等者得旅順之地於登鎮為外戶於東鎮
為咽喉欲防堂奧之入者勢不得不嚴外戶有
慮性命之憂者勢亦不得不慎咽喉則旅順為
最要害必守之地而東鎮與登鎮俱不容後焉
頃者張盤失守幾為腥羶之穴幸而虜不長驅
今尚可為張攀駐足又且收拾殘兵二千二百
三十員名及老幼遠民人等雖未可信有此數
諒非盡虛守土之計似亦有資但殘破之後人
心未固若復有兵無餉張攀豈即長城之鎮今
張攀以所需兵馬錢糧直欲資之登鎮其有見
于秉成登撫之語而登州于旅順應援相近耳
兵部當時覆疏未曾明言旅順兵糧定取之何
鎮以故登撫無憑從違延張攀出防已久而錢
糧杳無着落無乃以枵腹之衆河上逍遙乎查
旅順原係東鎮屬地舊時張盤亦為東鎮屬官
而軍士亦食東鎮糧餉則今之張攀亦應向東
鎮支糧無疑也夫欲登鎮增此一項錢糧無米
之炊勢必不能東鎮以原有張盤此項錢糧而

竟聽其不來接應亦無此事今為日後之計則聽登撫以歲發東鎮錢糧內照舊扣給旅順為目前之計則如登撫以萊州府見在銀四千八百七十七兩未變豆價銀一千五百五十九兩零青州府見在銀七千一十九兩零米豆一千七十七石零皆李勘科題追還官除抵還京邊及解發東鎮之餘者即就近給發以為旅順然眉之助若額數不足或聽徐汰登兵或于題留原餉六萬六千之內稍分萬餘以濟其急而以五萬餘為挑濬金州安插遼民之用權宜之計亦應爾爾是則旅順可守而東鎮登鎮俱可藉以無虞矣既經題

請前來相應具覆恭候

命下臣部行文登撫毛帥欽遵施行等因天啓五年六月十二日具題本月十五日奉

聖旨是欽此

太子太保戶部尚書臣李

謹

題為鼓鑄急需不容少緩謹條切要事宜以祈

聖裁以便奉行事專理新餉山東清吏司案呈天啓

五年六月初十日奉本部送戶科抄出督理順
天等處屯田屯兵事務都察院右副都御史董
應舉題前事等因天啓五年六月初五日奉

聖旨鼓鑄資本既商人樂輸公私俱便鑄局着到荆
日議建銅鉛一併嚴禁魏良佐准加僉事職銜葛
寅亮酌量加銜委任如議著應舉勅書中着兼戶

務殫心力有裨國用該部知道欽此又該山西道
試監察御史劉弘光題為兵餉並缺有因屯鑄
兼行宜亟謹抒末議用佐

國計要務事等因天啓五年五月二十二日奉

聖旨這本說兵餉屯鑄利病詳切至買銅禁銅尚自
有款項着該部一併覆議來說欽此欽遵通抄到
部送司案呈到部該臣等看得鹽筴錢法即古
所為鑄山煮海所以擅天地之利權生財之道

此其最弘巨者矣先是臣部題覆督鑄侍郎鄭
三俊恭報年終鼓鑄一疏因省臣解學龍之疏
而遂仍建局淮揚之說以為其地因商民王一
儒之議而遂採割沒挑河之款以為其本後因
盜臣陸世科之揭且慮本多銅壅故止議那借
十萬專以司官以便責成云爾嗣臣受事以來
目擊帑藏日匱條議鹽政及于鼓鑄及覆科臣
郭興治臺臣崔呈秀與議鹽法之疏計其可加
增而即解臣部以充新餉者若干其所搜括而

可為鑄本以漸抵新餉者若干疏入
報可臣部方欲次第舉行而平章軍

國者畱心經濟頗是臣言以為茲事體大則利權

宜重宜請

勅一大臣徃臣再補牘兼以鑄地請而

聖天子明見萬里謂扼要據上游淮不如荆便且念

臣部事繁而鼓鑄多隸工部職掌并

命工臣徃煌煌

天語臣等捧讀徒然洞目駭心爾矣夫今之御

命而徃者即督理屯田都御史董應舉也彼其金城
之畧能已見于天下今茲疏稱切要事宜信不
容緩據云商人汪重光等僉謂願輸新綱課銀
刻下可辦四十八萬以為鑄本而督臣亦以為
此四十八萬乃商之自為窩引地取厚利爭先
輸非出于借不待于搜措處于額外見利于秋
冬此其條議甚析臣部見不及此且媿且服所
當亟行兩淮巡鹽御史侯督臣至日相與酌行
者也至于爐舍衙門之宜議與夫陝銅蜀銅滇

銅之宜議買銅員外魏良佐之加帶道銜辦銅
挾銅之責成主事崔源之押解押運及禁私販
皆責之荆南道而權關主事亦與私販之禁收
銅稽漏查運諸事調用鹽法道臣葛寅亮此數
臣者或長心計或著清操廉慎虛公端詳精密
皆所為知人善任用當其才業荷

明旨咸允所請所宜再

勅銓部即行簡用者也又臺臣劉弘光謂

特設重臣督鑄荆襄始推戶銜旋改工銜以鑄為工

部職掌利與戶部共之倘職守未通往來或滯
請于督臣工銜添以兼戶于

勅書中明著錢鹽字樣此欲以釅而成鑄非故以鑄
而侵釅又可為長慮遠見所宜并行請

旨以便行文翰林院撰文者也至于銅禁不啻惓惓
器皿浮屠都為無益卓哉斯議其所隄防正與
督臣合皆俟督臣身任而行之矣夫鹽筴錢法
務以富國并欲利商兼任此者必有大道神而
明之存乎其人是役也將天下于督臣瞻仰焉

既經題

請前來相應覆

請恭候

命下臣部行文各該衙門一體欽遵施行等因天啓

五年六月十二日具題本月十五日奉

聖旨是欽此

太子太保戶部尚書臣李

等謹

題為懇恩解餉詳部以彰輸貲以終題

請事專理新餉山東清吏司案呈天啓五年五月十

六日奉本部送據直隸徽州府申稱休寧縣儒

學生員胡繼武痛父胡尚穆原係考授

武英殿中書舍人在任累効勤勞任故未沐

恩光今照例罄揭家貲四百兩輸助遼餉請自建坊

雖其孝親之誠可憫而急公之念更有足嘉隨

詳撫按批允在案乞照汪見遠例一體題

請俟

旨下日備劄行府俾本生為父建坊以表孝思則已
往者有所獎勸而將來者可動其樂輸矣等因
到部送司查得生員胡繼武為其父原任

武英殿中書胡尚穆捐助遼餉銀四百兩欲照汪
見遠例題

請建坊及查前銀已經呈堂劄納新庫俟實收到部
即為具題旌獎以鼓急公呈堂蒙批准題奉此
案候間今據餉庫投繳實收前來相應具題案
呈到部看得生員胡繼武痛父中書胡尚穆在
任病故未沐

恩光乃慨然為父追助遼餉銀四百兩欲照例建坊
以揚親名以圖不朽此其急公孝思良可嘉尚
及查臣部題

准捐助規則凡京外文武官紳舉貢人等助餉四百
兩以上粟八百石以上者各題建坊請

勅謄黃須給今胡繼武為父捐助銀四百兩與例相
合既經該司案呈前來臣等照例上

請恭候

命下臣部移咨應天撫按建坊旌獎仍照例移咨禮部請撰謄黃

勅書頒給庶人知嚮慕樂輸而軍興少裨萬一矣等因天啓五年六月初五日具題本月初八日奉聖旨是欽此

太子太保戶部尚書臣李

等謹

題為關運糧料價增額縮輸輓不繼庚癸堪虞懇祈

勅部蚤賜酌議措補以無悞軍需事專理新餉山東清吏司案呈天啓五年五月二十三日奉本部送戶科抄出督理遼東糧餉兼巡撫天津等處地方備兵防海贊理征東軍務都察院右都御史兼戶部左侍郎畢自嚴會同督餉省直巡按監察御史王祚昌題前事等因天啓五年五月

十五日奉

聖旨戶部知道欽此欽遵抄出到部送司案呈到部
為照初議五年關運米一百萬石于漕糧截二
十萬省直帶運三十萬東充買二十萬順廣大
買十萬津門買八萬漕米餘耗二萬屯糧二萬
部發折色八萬作米十萬共一百萬石後關撫
將兵餉一清歲止用米八十五萬餘石臣部移
文院部將前數減買院部廼于東充減買四萬
四千四百四十五石順德減買三千三百三十

三石三斗三升大名減買一萬一千一百一十
一石一斗一升共減五萬八千八百八十九石
四斗四升再加浙江帶運因灾傷改折亦減去
米六萬三千石通共減去一十二萬一千八百
八十九石四斗四升尚該實在關運米八十七
萬八千一百一十石五斗六升其價除截漕帶
運餘耗屯糧及山海折色外東充順廣大俱每
石七錢後增至九錢俱以所減之米為所增之
價惟津門所買八萬初止每石給價七錢既增

之後亦應照九錢例該找銀一萬六千兩今尚
未找足查見在八十七萬八千餘石較關撫所
定尚多米一萬九千餘石近又戶科裁冗官旗
共二千二百餘員名歲可省米數萬石又關門
道臣裁汰兵馬歲省米萬餘石則津門八萬之
米亦可做東充順大之例儘銀召買而足矣其
二錢之價可不必增也若所稱關門折色八萬
兩如院部所議俟浙江改折五萬四千兩解到
之日臣部找銀二萬七千兩以解關門給發又

所稱四年預截漕米五萬係關門用過之數蓋
四年截漕准截五萬院部廼截十萬後以五萬
為准截之數以五萬為五年預截之數今雖關
門用過猶應作五年數內之米也又所稱交卸
掛欠自有應賠之官旗在執而比之便可得也
又所稱漕米餘耗更屬烏有從來正耗自有舊
規到京交卸亦不能少而况天津留截既省到
京之費已得便宜又欲漏此二萬之餘耗何無
法也此當與掛欠並追者也初議五年關運豆

七十萬石于真定買十三萬河間買十二萬保定買十萬津門贗司買八萬霸州道買五萬密雲買三萬永平買十萬薊州買五萬屯撫高糧二萬搜括積逋舊豆二萬共七十萬石後關撫將馬匹一清而歲止用豆六十一萬六千四百四石零臣部移文督餉院部將前數減買院部廼于真定減買一萬一千八百一十八石零河間減買一萬九百九石保定減買九千九十石霸州道減買四千五百四十五石零共減去三

萬六千三百六十二石六斗三升尚該實在豆六十六萬三千六百三十八石零其價除薊州每石六錢二分永平每石六錢密雲每石六錢三分照原議外真保河霸原議每石五錢後增至五錢五分矣俱以所減之豆為所增之價矣惟津門所買八萬初止每石給價五錢既增之後亦應照五錢五分例該找銀四千兩今尚未找足查見在六十六萬較關撫所定尚多豆四萬七千餘石則津門亦儘原發之價照時減買

亦或足用也若所稱薊永十五萬應作四年之數者蓋此項原從四年十一月支本色之初為始故議者為應屬四年臣謂六年之豆亦就今年仲冬相應支給則不必再買而且易于銷美又所稱密雲三萬苦于價貴又苦于陸運聽其以一萬八千兩買米三萬運津而以其餘九百兩解抵津門買豆不敷之數亦是權宜而不缺派買之額者也此臣之計關門五年米豆者如此較督臣之疏似有差池其實錢糧之數無不

昭合督臣以四年預截之五萬不入五年之用又恐折色之八萬臣部不給則米之所以不足也薊永召買之十五萬已從去年仲冬支起今年仲冬又取給于六十一萬之內此豆之所以不足也

畿南東莞米豆價值俱已議增津門獨未找給此價之所以應找也臣謹屈指計筭以預截之五萬照已前截漕時舊議歸之五年關門折色八萬如督臣議以浙江改折五萬四千作主俟解

到之日臣部找發薊永豆十五萬去年從十一月支起今年將來年之豆亦于本年十一月支起則于關撫所定之數亦不甚差津門之米豆亦可減買而價亦可不找矣總之督臣責在轉輸糧料缺乏職司其憂故不敢缺于額之內臣部時值艱難得減毫末實寬擔負每欲歎于額之中苟得東捧西捨那前趨後不至庚癸頻呼則督臣之願足矣臣之心亦幸矣如果瀚海長波糧船未必隻隻盡到米豆亦未必粒粒得用亦宜長慮但關撫定額之後兵已不召增馬已不買湊逃故倒斃亦不能人人俱存匹匹如舊即米豆稍有缺額彼此消長亦應相當若必欲饜山海之欲年來止聞數十萬之浥爛並不報顆粒之羨餘所與雖多徒供谿壑臣又不能不惜之也既經題

請前來相應覆 請恭候

命下行文督餉院部及關門撫院欽遵施行等因天啓五年六月十六日具題本月十九日奉

聖旨是欽此

太子太保戶部尚書臣李

等謹

題為入衛兵馬錢糧無措酌銷以前用過之數併
議以後免給以清虛懸以節財用事專理新餉
山東清吏司案呈天啓五年六月初二日奉本
部送戶科抄出總督陝西三邊軍務兼理糧餉
兵部右侍郎兼都察院右僉都御史李從心題
前事等因天啓五年六月二十一日奉

聖旨該部知道欽此欽遵抄出到部送司案呈到部
案查陝西固原入衛兵馬支過行糧安家銀共

一萬三千一百七十兩零俱于天啓三年新餉
內開銷移咨到部臣部查得行糧例該戶部出
辦已准開銷銀七千七百七十兩零其安家例
坐兵部不准于新餉內開銷咨覆去後兵部謂
新餉已歸戶部無可支給督臣又謂司藏搜括
如洗不能扣抵往覆文移不啻數四今又請開
銷前來夫入衛軍丁雖起于元年其實原踵舊
例其動支錢糧亦應照依舊例不得動支新餉
也明矣况安家行糧各有司存不得以安家而

歸戶部也又明矣縱錢糧甚少例端難開且未
知入衛之軍何時而已臣部不得不行爭執今
該督臣謂創行之初不得不曲從優厚其動過
安家銀五千四百兩欲于天啓三年加派新餉
銀內贍家五千四百兩欲于缺官柴馬銀內各
照數開銷以後更換入衛兵馬照依延鎮事例
于沿途關支行糧料草不得再給安家則前後
葛藤自此可了以權宜之術濟時勢之窮即臣
部亦不得不為之曲從矣既經題

請前來相應具覆恭候

命下臣部行文兵部及三邊督臣欽遵施行等因天
啓五年六月三十日具題七月初三日奉
聖旨是欽此

太子太保戶部尚書臣李

等謹

題為裁兵似可得餉行伍之解散何術減餉似可
助遠加徵之偏累何抵懇乞

聖明勅部酌議務期兩全以蘇久困遺黎以消中原
隱禍事專理新餉山東清吏司案呈天啓五年
六月十七日奉本部送戶科抄出巡撫河南等
處地方提督軍務都察院右副都御史程紹題
前事等因天啓五年五月二十五日奉

聖旨該部知道欽此欽遵抄出到部送司案呈到部

照得河南舊撫臣馮嘉會因妖賊震鄰伏莽未靖討各衛之舊兵增三營之新卒團練防禦而畱抽扣之新餉以餉之其綢繆陰雨非不稱善而實未知榆關之急更有急于兩河者臣部因欲還餉覆

請裁兵以為河雒中原之地無所煩七萃六郡之良文移往返爭之甚力而新撫臣程紹又稱回賊竊發聚眾稱亂添兵防禦已經兵部覆

允今止將河北步兵量裁一半其馬兵官廩賞格等

項俱不裁減于十一萬之餉仍畱七萬于地方僅解四萬于本部則或者無事欲為有事之備而姑為此不必然之慮乎不知各衛之舊兵可以供訓練各邑之民壯原以資防守釋此不問而復議增兵畱餉然則該省前此二百六七十午何以無兵也哉且撫臣謂剗中州之肉補遼左之瘡舍田芸人割身忍痛試觀今日之域中允加派允雜項有一不為遼左者乎遼左朝廷之幅員也可謂之芸人田乎撫臣又謂提督何

務職掌空懸夫提督軍務之銜其非始于程撫
增兵之日明矣而顧安得至今日始欲以此新
增之三千實提督之職掌也顧說者以為三千
之兵真可不增撫臣蓋難于解散耳如此則姑
聽撫臣督之練之暫留七萬之餉餉之汰其老
弱收其驍勇卽有死亡不必再補既少而精庶
不失撫臣惓惓備患之意而餉以漸減漸扣亦
不失撫臣加意榆關之心至歲解四萬之餉似
應隨扣隨解早濟急需不必定俟年終也既經

具題前來擬合具覆恭候

命下臣部行文河南撫院欽遵施行等因天啓五年

七月初三日具題初六日奉

聖旨是該部便行文河南撫院遵照施行欽此

太子太保戶部尚書臣李

等謹

題為危疆數月絕餉饑兵旦夕莫支懇乞

聖明亟

勅那發以免內譁以消外侮事專理新餉山東清吏
司案呈天啓五年七月初一日奉本部送戶科
抄出巡撫遼東山海關等處提督軍務都察院
右副都御史喻安性題前事等因天啓五年六
月一十八日奉

聖旨遼餉久稽着該部作速措處先解六月以前仍

按月預發不得借口清餉故為延緩欽此又諫巡
按直隸監察御史洪如鐘題為兵餉查核欲嚴
饑卒待哺可念懇乞

聖恩軫念危疆速為措發以安軍心事等因天啓五
年六月二十九日奉

聖旨關門需餉然眉止因外解未至致稽解發近聞
食菜中毒深有可憫便着諫部作速湊補陸續接
濟其外解遲緩者行文嚴催如再不應從重叅來
治罪欽此又諫戶科叅看得榆關所議澄汰者蓋

欲塞漏卮于彼以充軍實于此非借清兵之名
以負各兵月餉也今自四月以來閱三個月矣
柰何僅得楊主政十萬到關而此外不聞繼發
乎雖有月糧五斗而鹽菜無資甚非體恤邊軍
至意老庫節省與巡青剩餘已奉

明旨准借矣須即時解發以解然眉其未敷者查新
餉司或有新收或別項設處務照洪關院所題
每月二十萬補足前數斷難再挨令荷戈軍士
典衣易食至衣無可典而以待哺爭號也抄出

言音考
速之各等因到部送司案呈到部為照饑餒之
卒不可以應敵脫巾之患每起于枵腹關門何
地臣職司邦賦責在足食未有有銀在庫而敢
慢應不發者未有可為湊處而不湊處忽鼓譟
脫巾為不足慮者自受事以來所為朝拮据夕
籌畫而一息不寧者無如關餉所為嚴公移之
催遣守催之官幾禿毫穎錯趾道路者無如關
餉所為異有外解之至寸心時懸而望眼欲穿
者無如關餉所為苦于外解不至仰屋興嘆而

五內如炙者無如關餉其餘邊餉雖均苦缺乏
雖均不敢泄泄從事于此為獨急焉及查關餉
每月諛銀二十四萬兩內除副使劉詔裁汰老
弱月省銀四千九百五兩二錢又戶科都給事
中林宗載因餉核兵一疏內稱堪裁官兵三十
五項月省銀七千有奇每月實諛發銀二十二
萬八千有奇自四月二十日新餉司主事楊呈
秀領銀十萬兩行後則有委官孫繩武領銀五
萬兩以五月初十日行又委官王文鐸領銀六

萬五千兩以六月初三日行又委官孫繩武領銀十一萬二千一百八十兩以六月十七日行又委官王文道領銀五萬四百兩以六月二十八日行又于本月初四日先給委官郭從詔銀十萬兩以上共發過銀四十七萬七千五百八十兩皆老庫節省巡青問寺諸項與各省直零星解至湊發者也計各軍餉在四月五月者已完在六月分者亦發銀二萬有餘乃撫按疏云三月無餉恐發在六月二十八日以後者時尚未至若十七日以前者豈亦尚滯道路間耶夫清汰自清汰轉輸自轉輸豈以清汰之故懸待之關門而敢為稽遲耶又豈以奴酋蓄銳興水西虜窺蒙近郊軍丁食菜中毒盜船梟示危迫若此臣部敢如聾如聵坐視不理至有三月不發之餉耶除臣部一面行新餉主事查前項發過銀兩今俱着落何處外併乞

勅諭撫臣檄問各道前此所發有無到鎮其六月分餉目前有一分解至即當發一分以為接濟不

言音考
敢須臾緩也再照清汰之議日延一日在關門
餉司以每月二十四萬索者分厘不減而近談
科臣疏題叅駁云每月二十萬足矣即今抄叅
撫臣喻安性疏亦云務照洪關院所題每月二
十萬補足前數然則臣部又何能多發于二十
萬外况鉅蠶蠱恥實亦難踰分毫外也是在關
撫道臣速行清汰減兵就餉如科云數則省一
分臣部當此千匱萬難之日得受一分賜也既
經具題前來相應具覆恭候

命下臣部遵照原奉

明旨行文各省直嚴催如再不應從重叅治等因天
啓五年七月初五日具題初八日奉

聖旨是欽此

太子太保戶部尚書臣李

謹

題為差期告屆謹請裁併懇乞移咨題覆以便交代離任事專理新餉山東清吏司案呈奉本部送准督理遼東糧餉兼巡撫天津等處地方備兵防海贊理征東軍務都察院右都御史兼戶部左侍郎畢咨稱據贊理遼餉戶部湖廣清吏司員外郎萬國孚呈竊照贊理遼餉之差一年一換故三月之前預申報滿此差例也本職自天啓四年八月二十四日奉

旨差委十月初一日到任扣至天啓五年九月三十日一年差滿例宜預報候代合無顯請歸併候題覆請

命下之日職將經手錢糧

勅印文卷一一交代以便離任等因到院部據此案查天津贊理司官原以一年為期今據本官呈稱本年九月三十日期滿例應另行更代但近日贊司有裁革歸併之議應候覆

請定奪除經收經放錢糧并截漕召買補造船隻等

項悉聽臨期查算交代明白造冊開報外擬合咨請為此合咨本部煩為查酌議擬歸併以便交代等因又據贊理遠餉本部湖廣清吏司員外郎萬國亨呈同前事各到部通送到司案查先奉本部送戶科抄出巡按直隸監察御史吳之仁題為再陳昌保瀛津事宜仰乞

聖明軫念邊海重務等事內稱一定官守以省繁冗津門彈丸之地前時惟津道餉司清軍廳止耳邇來部院之外又有撫院津道餉道之外又有

贊司軍廳之外又有兵糧廳糧馬廳供應疲憊
猶其小也十羊九牧一婦衆姑欲職掌無侵事
權之一得乎近

廟議裁撫歸併部院夫撫部分理兵餉者也尚可合
併乃餉與餉本一事而兩操之可乎臣謂兵糧
廳糧馬廳事原不煩設一而足兵糧同知王從
諫既已物故便當裁缺而總以糧馬同知領之
更為省便至若餉道原為遼東督運而設事煩
責重無庸復議然事既統于餉道矣若贊司之

設又何為哉即云錢糧道不經手出納應從部
差但即以舊餉司兼之亦何至方圓畫而左右
盼有不便于遠運乎匱乏之時多官不若省官
諛部諒有以處此矣此又津瀛之事宜可議者
也雖然臣議矣議而覆之則在諛部覆而行之
又責在各屬伏乞

聖明重念

陵寢重地邊防海防勢不容緩即

勅諛部酌議具覆而臣即以部覆報可者行各屬着

實舉行庶邊海不無小裨而臣亦少逭尸素之
愆矣等因奉

聖旨這條奏重鎮防守事宜該部即與議覆欽此欽
遵抄出到部送司案呈到部查得津門贊司雖
係臣部差官其可歸併與否尚在津部為政隨
經移文督餉院部酌議去後隨准津部回咨內
稱為照津門初設督餉衙門止有贊司一官分
理一切本折之出納糧料之飛輓皆其職掌非
有兼才未易勝任而愉快者速後添設督餉道

專管發運糧料事務贊司止管綜理糧價運價
以收放銷筭為職雖覺事權漸輕實亦日不暇
給又况關鮮運務目前愈增愈夥若米若豆不
敷則設法召買糧價運價不給則連牘催請夫
豈一手一足之所能任譬之舉大木者未有不
呼邪許而集衆力者也津門雖有餉司收支新
舊本折糧餉政務亦莽一朝歸併恐向來分任
而未見其有餘從今兼任而祇覺其不足矣及
查見任贊司員外郎萬國孚操持廉介識見敏

明履任已三閱月錢糧多其經手既啣

王命而出恐難中途而返似當仍令始終其事以聿
觀勩之効者也徐俟運務漸簡歸併可行或
待本官任滿之日而後圖之亦未晚耳至於兵
糧廳原緣津門軍旅事殷責其清查而以餘力
及運事者但今津兵徵調已多即管糧一廳可
以完運務如見任兵糧同知徐欽當照關院條
議裁併其缺聽令赴部改選者也等因咨覆到
部送司案存在卷今准督餉院部移咨前事諛

臣等看得津門贄司之設初緣津部事甚繁重
藉以分理一時運務初始經營商度不可無人
嗣後添設督餉道而贄司之事權于此便已減
半今雖關鮮二運事尚繁雜第照巡關題議以
舊餉司兼之則錢糧本折出納之數既有歸着
而勩運務又不乏人歸併之議允為至當其
裁兵糧廳歸之糧馬廳津部業已說明臣部無
庸再議既經督餉部院移咨并員外郎萬國孚
呈請前來相應題

請恭候

命下臣部行文津部并贊理遼餉員外郎萬國孚即
將經手錢糧文卷一一與舊餉司員外郎王若
之交代回部兵糧同知徐鈇另聽改選其贊司
守卷書役照原題人數隨併供役以便經承錢
糧庶綜理有兼任之人而官守省繁冗之費矣
等因天啓五年七月初七日具題本月十一日
奉

聖旨是欽此

太子太保戶部尚書臣李

等謹

題為五月無餉堪憂舉世不念更堪憂懇乞

聖明立救饑兵以重封疆事專理新餉山東清吏司
案呈到部天啓五年七月十三日該臣閱邸報
見少師兼太子太師兵部尚書建極殿大學士
督理軍務孫承宗題前事等因查得關門月餉
先該巡撫喻安性題稱危疆數月絕餉饑兵旦
夕莫支關院洪如鐘題稱兵餉查挾欲嚴饑卒
待哺可念該臣細查關餉除五月以前照數全

言音考
發外六月又發過二萬兩已將委官姓名起運
日期銀兩數目備開

上陳後于本月十二日委官陳應時等又領去銀八
萬兩六月分餉銀亦總發過十萬雖在後給發
者一時未到乃六月中旬所發豈有至今未到
之理關撫曰三月無餉臣已不勝驚駭今樞輔
曰五月無餉臣益不勝心悸夫嗷嗷三軍救死
而恐不贍而尚言歡愉哉誰任轉輸乃令其無
米無衣以死也臣持籌無能致悞封疆即百身

何以贖罪輔臣近日行邊備歷錦州杏山間或
關門解到之餉輔臣遠不及知耳臣又查天啓
三年六七月間乏餉主事郭竹徵以米代銀給
放徑得以濟天啓四年亦做行之今臣部措辦
新餉如彼其艱當餉銀未至之時何不通融于
本色而盡以本色給之乃膠守一月五斗之說
立而視其死耶夫人一日不再食則饑而况荷
戈執戟之士乃令枵腹若此臣罪何辭總之月
餉不繼苦于外解之遲然自楊主事到任三月

言音考
諛六十餘萬而本部已發過五十餘萬輔臣勞
苦行邊以為

社稷臣何敢漫無入心漠不相關而置軍兵枵腹危
急于度外耶除五月以前通完外其六月欠銀
一半與七月分以後未發外解朝至即便夕發
若餉司唐登雋所請銀五萬兩見經戶科抄叅
駁查尚俟咨議定奪此又出于臣部月給之外
者也臣等可勝惶悚待

命之至等因天啓五年七月十四日具題本月十七

日奉

聖旨樞輔五月無餉諛部又云六月已解一半何矛
盾至此以後餉司凡餉銀解到務要刻期登報給
發以救饑軍欽此

太子太保戶部尚書臣李

等謹

題為錢局規畫已就銅本措辦宜先謹將摺括款
數臚列上

聞以滋生息以圖永久事專理新餉山東清吏司案
呈天啓五年七月初四日奉本部送戶科抄出
總督薊遼保定等處軍務兼理糧餉經略禦倭
兵部右侍郎兼都察院右僉都御史今革任冠
帶閑住候代吳用先題前事等因天啓五年六
月二十七日奉

聖旨諒部知道欽此欽遵抄出到部送司案呈到部
照得督臣吳用先先因邊餉匱竭請於密雲開
局鼓鑄以資軍餉臣部題覆准行去後乃初試
以二千餘金之銅鉛遂得一千餘金之鑄息獨
是今之所慮者不在鑄息之不多而在鑄本之
難措不在局爐之不廣而在銅鉛之不繼乃督
臣區畫則以任内存積銀一千五百五十七兩
零考汰標下冗員省存糧銀四百六十兩零前
任督臣王象乾糴本利息銀除動支外餘銀二

千九百四十五兩密雲餉司庫貯遠年馬價等
銀二千五百二十三兩零兵餉同知范文源庫
貯有解剩視師牛價等銀四千一百六十八兩
零密雲縣庫貯遠年班營逃兵寄收布花月糧
等銀三千三百五十六兩零又舊督臣自遼東
失後取來已鑄紅銅七千七百八十五斤計銀
一千一百五十二兩又鑄息一千一十七兩零
合之共可得鑄本銀一萬七千一百七十餘兩
則固充然足用矣又議差廉幹佐貳或候缺衛

幕以督臣衙門之符驗齎銀往產銅處所分投
收買行令買銅文批到收買地方如山陝則於
院道衙門掛號荊州則於總督錢法衙門掛號
銀銅數目及起身日期經繇道里明白填註批
文以絕其私買私賣及違限遲誤則買運無所
容其弊矣以一萬七千之本差官循環買運銅
可不匱於用爐座不妨畧增一二聽管局同知
范文源酌量督臣之請舉皆可行所當依議若
夫所設前項鑄本永為局中之物不必還庫後
日所獲鑄息按季報部即於應發該鎮月餉內
扣除范文源才可為俸既逾年可否留任俟
成功優擢則以聽之吏部酌行可也既經題
請前來相應議覆恭候

命下欽遵施行等因天啓五年七月二十一日具題
本月二十四日奉

聖旨是欽此

太子太保戶部尚書臣李

等謹

題為兵餉當充還就兵中求核民困已極亟與民間加甦敬陳末膚少裨安攘事專理新餉山東清吏司案呈天啓五年五月初二日奉本部送戶科抄出四川道試監察御史汪裕題前事等因天啓五年四月二十七日奉

聖旨諛部知道欽此又諛河南道試監察御史李應公題為致治別無竒策救時當講實著謹就目前職掌提出扼要精神以除積習以襄

維新之政事等因本年四月二十七日奉

聖旨諛部知道欽此又諛陝西道試監察御史石三畏題為人心浮飾日巧政事廢弛彌甚謹摘時弊極而關係重者以圖實心振刷以襄

聖明新政事等因本年四月二十四日奉

聖旨條陳冗泛以後須要明白簡切諛部知道欽此又諛江西道監察御史張鯉題為圖治貴澄其源行政要求其實謹陳膚見以裨新猷事等因本年六月十五日奉

聖旨察吏安民用人理財核兵清餉俱今日要務其喫緊處只在撫按實心為地方耳以後撫按不效吏部都察院不得辭其責本內既說人衆挨濟不得識面當設何法以便甄別南中舉人拖欠數多何地何人何不指名叅奏俱着回將話來關門抽調軍士徒勞罔功着樞輔議妥來看欽此又諛戶科給事中陳序題為秋防時迫枵腹可虞謹議外解之法期無悞封疆事等因本年七月初六日奉

聖旨諫覆議具奏欽此欽遵通抄到部送司查得諸
疏中徵收起解之法當立火耗攤派之禁當嚴
與夫濫科濫罰之荼毒及佐貳紙銀戶房贓儀
之常規所當並為申飭禁止俱應本部題覆案
呈到部諫臣看得吏治民生國所與立乃吏治
之敝至今日而極民生之困亦至今日而極矣
夫惟正之供既不可後新派之餉又不可蠲所
賴一二良司牧奉宣

德意以撫字為催科耳而詎意貪殘剥膚有如諸臣

所言者臣謂凡州縣徵收務要先定赤曆比同

繇票閭縣錢糧分零合總一一註明凡地一畝

人一丁原派銀若干今增銀若干一年共應納

銀若干納米若干揭示通衢及于僻壤即照依

此數分季分限以定比較分戶分丁以定比簿

百姓納銀繇票即與州縣征收簿同州縣征收

之簿即以為上司查盤之簿不許臨期謄寫無

從置問其完糧聽民自封自投各州縣官止令

一吏書看櫃記簿昔山東舊撫行之一時人心

言音考
樂于省費而快于供輸宜可做也又須嚴示吏書不得因而需索如此則在官在民洒然一清攤派無所容其奸火耗無所恣其勒矣至于起解科臣陳序謂宜行冊報之法臺臣張鯉謂宜行歛解之法焉蓋外解遲悞多道護之府府諉州縣州縣又諉窮民玩日愒月置若不急之務乃在內止知大勢之完欠既不更問遲速故急緩者得以藏拙而早完者亦同歸耽遲今莫如分別冊報之法令各府總計所屬州縣某先某

後投文驗銀次序造冊順付解官齎投戶部或有十分遲悞就将先完州縣起解冊後明註某州縣欠餉若干另文起解字樣一面作速催完責令本州縣糧官自解回話其道催府亦用此法該部酌地遠近大約二千里不過三月三千里不過四月四千里內外不過五六月務要上半年全完遲違者即以白簡分別叅處法在必行有不竭蹶恐後者誰耶吏收官解稱便民矣乃不肖有司仍僉富戶點里長以幫添搭既隨

佐貳入府又備本官盤費是不以安民者害民
耶查得州縣解銀到府每千兩則府索添搭銀
三十五兩州縣不肯自備不得不取足于富戶
今惟行歛解之法本府出批委官自赴各州縣
取銀起解銀不經府則添搭自無委官又何名
需索乎且本府一不自染指而州縣火耗之弊
亦可以嚴禁而民有瘳矣是則正賦外之有加
派民力固有不堪而催科中之有撫字民心猶
或可固伏乞

勅下臣部移咨各省直巡撫併咨都察院轉行各巡
按御史嚴檄藩臬諸臣責成府縣一體遵行如
再有徵收起解仍行貪殘火耗科歛不即嚴禁
者撫按官不時叅處奏

聞庶民生吏治兩攸賴矣等因天啓五年七月二十
四日具題本月二十七日奉

聖旨是欽此

太子太保戶部尚書臣李

等謹

題為東西兩局未結兵餉日匱可憂懇乞

聖明嚴勅內外諸臣共勵廉節各秉實心以建長策
以靖邊疆事專理新餉山東清吏司案呈天啓
五年四月二十四日奉本部送戶科抄出戶科
給事中楊文岳題前事等因天啓五年四月二
十日奉

聖旨該部知道欽此又該戶科給事中張士升題為
足

國要在裕民裕民莫先首令謹酌議抵餉以甦疲
黎以明職掌事等因本年四月二十一日奉

聖旨這抵餉各款切見易行着該部即與議覆欽此
又該刑科給事中杜齊芳題為民生之困弊有
因法紀之陵夷當振謹陳端本之言仰裨

維新之政事等因本年四月二十五日奉

聖旨課吏治挾兵餉全在法嚴該部知道欽此又該
貴州道試監察御史智銓題為民生窮蹙日甚
國計匱乏愈多謹陳力行實著以清冒濫以蘇民

困以裕軍儲事等因本年五月初二日奉

聖旨該部知道欽此又該刑科給事中蘇兆先題為
天下有不得已之勢

朝廷有不得已之政臣子宜迫出一不得已之心以
實求安攘共計時艱事等因本年四月二十四
日奉

聖旨兵宜練不宜增餉宜清不宜加這本說的是王
業浩准復原官余大成劉一燦已有旨了該部知
道欽此又該山東道監察御史李嵩題為恭逢

明聖聿覩

中興敬進利忠用持

恭運事等因本年六月初四日奉

聖旨這條議五款關切時事諛部即與覆行欽此又
諛巡按直隸等處監察御史潘雲翼題為

國家經費不足海內糜費尚多宜挽逝波用資仰
屋謹摘陳一節以備搜括之實着以佐儲餉之
末議事等因本年六月初八日奉

聖旨是這公費銀兩着府州縣便解充軍餉程飯等
項照嘉靖六年考查裁革敢有仍前饋送者定行
叅革便着諛部即與覆議通行欽此又諛廣西道
試監察御史王珙題為

國用誠非得已民情實亦堪虞利止養奸法不勝
弊謹摘其可省者與可議者陳乞

聖裁以裕

國計以恤民生事等因本年六月十九日奉

聖旨近因國用匱乏有旨搜括庫藏何嘗搜及民間
至于監督大工頗見勤敏如何反說怠事呂濟張

醇儒着照舊供職願造方在擢用不必薦舉市恩
諛部知道欽此又諛河南道監察御史謝文錦題
為中外艱危可慮

廟謨區畫當周敬摠未議以佐安攘事等因本年六
月十八日奉

聖旨諛部知道欽此又諛山東道試監察御史陳睿
謨題為

泰運方隆圓形迭見敬進節省之說以佐軍

國之籌以規長治之圖事等因本年六月初二日

奉

聖旨人臣一意奉公凡事節省其于財用豈但能生
亦且常裕今後內外各衙門務要一體奉行本內
周延光蔡夢麟着諛部分別議處欽此又諛山東
道監察御史馬逢臯題為時事可虞

朝政宜修謹陳未議仰祈

聖鑒採擇施行以保治安事等因本年六月二十三

日奉

聖旨諛部知道欽此欽遵通抄到部送司查得諸疏

言音奏
中抵餉之說鼓鑄之政與夫清兵清餉之議俱
應本部具覆案呈到部諛臣者得今

國家財用日匱調度日難而師老于外民困于內
寬恤之今日下簡練之訓時聞而未有以應也
豈足食足兵願不可神明其用乎夫餉欲足而
未始不可以抵為足也兵欲足而未始不可以
清為足也則諸臣所言亦既纒纒矣夫抵餉之
議則科臣張士升蘇兆先臺臣李嵩潘雲翼之
言也彼謂凡府州縣每月放告三次其舊規也

今後一切准理詞狀盡數開報上司問理之後
某事釋放某事擬贖留十之二三以補公費之
不足而十之七八則季終盡解藩司抵充加派
合天下計歲可得十餘萬勒添火耗縱役需索
奔走叅謁歲時饋遺

功令諄諄而弊相沿如故各省直撫按叅疏不仍
曰加一加五乎今後應令附郭之縣府官時出
不意搥櫃面拆外縣時委府佐賢者省騶減從
乘間突至拆兌如前如有加一加五之數即畱

民間以抵加派可矣修理分司脩理船隻歲歲有派而實未嘗歲歲修理也此可減也大小鋪陳過客自携鋪陳之費可減也旗幟鼓吹有禁各役之工食可減也至于府州縣之皂快如蟻聚羶汰亦不去不但當盡革其工食以抵充兵餉即就其人亦可半減也各差御史搜括贖鍰用助遠餉矣繇制撫以及監司守令誰無額費額罰乎俸尚可捐矧是阿堵應令斟酌商筭年終解部以抵餉額事平即止彼冰蘖自持之人

何難以兩袖之清風作萬家之春雨哉公費一項有額支襍支綱銀會銀而皆非各府州縣不得已之用也半充私橐半充交際已耳交際則上司使客與夫親識之經過往來耳折程折席土儀供給此在上司過客多有不收已屬無益而况驛站坐飯中火廩蔬無不備者儘足一宿半晌之用而府州縣以及司道之程飯又何用乎查嘉靖六年令巡撫等官查考各州縣有令見年里甲本等差役之外輪流直日分投供給

及遇往來過客任意攤派下程陳設酒席等項者拿問罷職若二司官縱容不舉撫按官以罷軟開報蓋自此而後將前項襍費明派里甲之中小民出銀官為代辦法非不善然而襍派襍支總屬糜費綱銀會銀儘可清查是抵餉之說宜嚴行撫按以身率先申諭民收加意樽節者也若鼓鑄之政本部原行之以濟遼餉之窮而實為生財足國之道如臺臣智銓謝文錦之酌鼓鑄也尤可採焉以謂買銅一節大為民累蓋立局于數千里之內而取銅于數千里之外無論陸運一年後將不繼而買銅者衆則銅價愈高且買銅之役必不能餐風吸露神運鬼輸騷擾賠累仍在民間其弊更甚于加派故鼓鑄之局斷斷宜設于各省直產銅之處其工本不足各處協濟則以錢易銀一通融之易易耳即如各州縣所有

宗室祿米師生廩膳民皂夫馬等項工食額派條編原出之民間者合無行令各附近州縣將銀

彙解附近鑄局而該局鑄出制錢盡數發還州縣給散各項人役此項所餘子錢即抵充該州縣遠餉扣減民派漸抵漸減行之數歲而民免加派之苦矣此不損上而可以益下尤在民牧加之意耳若權關之役原有定額而羨踰于正滿載而歸者自有之乃廉者亦引嫌前後相沿積習而不能破例以急臣部近該臣部各有量加即當以此分數定紀錄參罰可也清兵之議則科臣楊文岳臺臣謝文錦陳睿謨王珙馬逢

臯之言也彼謂多兵不如精兵多餉不如清餉今在外之疾呼遲一刻而脫巾立告在內之搜括兼百法而催輓難前而一入軍中泥沙竟不可問也則宜急行汰簡之法分戰守屯為三等而糧之厚薄因之強者捍禦弱者牧圉汰其無用還其遠調歲可省餉百數十萬且清其扣減者以歸軍伍則饑化為飽清其老羸逃亡者以歸驍壯則弱化為強養一人得一人之力即以重兵壓奴境而講恢復可矣應

勅兵部檄行關上道鎮度天下之力定久遠之規取
兵之數與餉之數相勘用兵之日與用餉之日
相勘實實一番振刷勿以情面開銷如近日道
臣副使劉詔僉事劉永基已毅然裁省然裁之
外更有可裁省之內更有可省如各鎮班軍不
過為修墻做工乃歲費巨萬如鹽菜等銀夫鎮
各有軍有事則荷戈以赴敵無事則荷畚以營
工似亦可為即謂

祖制必有深意然在今匱乏之時或亦當以通融議
省也至所稱督臣吳用先言各鎮之節存銀二
十餘萬樞部之議裁兩帥歲可省二十餘萬又
稱關門之本色既竭民間之脂膏乃半為風雨
之催損半供國戶之轉賣俱俟臣部檄行餉司
面同道鎮查覈而覆行之伏乞

天語申飭法在必行務俾官守飭而節愛行本源清
而上下足其關於軍

國非渺小也既經諸臣條議前來相應具覆恭候
命下臣部移文各省直及山海撫道并咨都察院轉

行各巡按御史一體欽遵施行等因天啓五年
七月二十八日具題本月二十日奉

聖旨是欽此

